

I. DISPOSICIÓNS XERAIS**CONSELLERÍA DE ECONOMÍA E INDUSTRIA**

DECRETO 174/2024, do 29 de xullo, polo que se modifica o Decreto 81/2017, do 3 de agosto, polo que se crea a Axencia Galega da Industria Forestal e se aproban os seus estatutos.

A Lei 2/2017, do 8 de febreiro, de medidas fiscais, administrativas e de ordenación, na súa disposición adicional sexta autorizou a creación da Axencia Galega da Industria Forestal como axencia pública autonómica que ten como fins xerais e obxectivos básicos actuar como un instrumento de xestión eficiente no exercicio de funcións relacionadas co impulso da actividade económica asociada ao sector forestal, coa mellora da competitividade e da innovación das empresas do sector e coa coordinación dos centros de investigación en materia forestal.

O Decreto 81/2017, do 3 de agosto, polo que se crea a Axencia Galega da Industria Forestal e se aproban os seus estatutos, creou a Axencia e aprobou os seus estatutos, establecendo a súa organización e funcionamento.

O 14 de abril de 2024 publicouse no *Diario Oficial de Galicia* o Decreto 42/2024, do 14 de abril, polo que se establece a estrutura orgánica da Xunta de Galicia, coa finalidade de adaptala ás necesidades que o momento aconsella, e tendo en conta os criterios de eficacia e economía que deben inspirar a actuación e a organización administrativa. Nesta estrutura queda integrada a Consellería de Economía e Industria.

O novo esquema organizativo concrétase no Decreto 49/2024, do 22 de abril, polo que se fixa a estrutura orgánica das consellerías da Xunta de Galicia, o cal, no seu artigo 5, estrutura a Consellería de Economía e Industria nos seus órganos superiores e de dirección e lle adscribe os entes dependentes. A súa disposición adicional sexta establece que a Axencia Galega da Industria Forestal estará adscrita a esta consellería.

Finalmente, o Decreto 140/2024, do 20 de maio, polo que se establece a estrutura orgánica da Consellería de Economía e Industria, concretou a organización da Consellería ata o nivel de servizo e, ademais, dispuxo normas relativas aos cambios resultantes da nova estrutura da Xunta e das consellerías. Entre estas normas están a disposición adicional décima, relativa á adscrición da Axencia e do Centro de Investigación Forestal de Lourizán, e a disposición derradeira primeira, que contén a modificación do devandito Decreto 81/2017, do 3 de agosto.

CVE-DOG: 14iqj073-s9y4-p736-49s3-ea977bquoeg9



Neste contexto de cambio e co fin de que resulte máis eficiente o impulso das políticas necesarias en materia sectorial, cómpre realizar modificacións puntuais na estrutura da Axencia. En particular, coa actual configuración da Área de Innovación Forestal, que asume a xestión de CIS-Madeira e do Centro de Investigación Forestal de Lourizán, requírese a inclusión destes dous centros na estrutura con nivel de servizo e a concreción dos servizos ofrecidos polo CIS-Madeira.

Na súa virtude e en uso das atribucións conferidas pola Lei 1/1983, do 22 de febreiro, de normas reguladoras da Xunta de Galicia e da súa Presidencia, por proposta da conselleira de Economía e Industria, logo de deliberación do Consello da Xunta de Galicia, na súa reunión do día vinte e nove de xullo de dous mil vinte e catro,

DISPOÑO:

Artigo único. Modificación do Decreto 81/2017, do 3 de agosto, polo que se crea a Axencia Galega da Industria Forestal e se aproban os seus estatutos

Engádense os puntos dous e tres ao artigo 21 do Decreto 81/2017, do 3 de agosto, polo que se crea a Axencia Galega da Industria Forestal e se aproban os seus estatutos, que queda redactado como segue:

«Artigo 21. Área de Innovación Forestal

1. A esta área correspóndelle o impulso e establecemento de mecanismos de colaboración con centros de investigación públicos nas diferentes materias que o sector da industria forestal traslade á Administración por consideralos do seu interese. Exercerá as seguintes funcións:

a) O impulso á investigación e a coordinación e a cooperación dos distintos centros de investigación e innovación tecnolóxica vinculados ou adscritos á Axencia.

b) A coordinación da transferencia de coñecemento e tecnoloxía nos diferentes proxectos da investigación forestal entre os diferentes axentes vinculados á industria forestal (administracións, universidades, asociacións, fundacións e empresas e plataformas forestais).

c) Accións específicas en materia de impulso no aproveitamento sustentable, activo e resiliente, e posterior valorización dos recursos forestais e de produtos baseados na madeira, en particular na procura de novos usos que outorguen un maior valor engadido, así



como daqueles proxectos que poñan de relevo a circularidade, en especial aqueles que afonden no principio de uso en cadea da madeira e daqueles que afonden na bioeconomía.

d) A prestación de asistencia e asesoramento a entidades e empresas do sector forestal e baseadas na madeira para o desenvolvemento de proxectos innovadores.

e) O desenvolvemento de programas de apoio á diversificación da actividade económica forestal no medio rural.

f) O impulso á internacionalización do sector forestal de Galicia, así como na participación en proxectos internacionais, como eixe clave na mellora da comercialización e diversificación dos produtos forestais.

g) Calquera outra función que se lle encomende no ámbito da súa competencia.

2. Adscríbense á Axencia Galega da Industria Forestal, baixo a dependencia orgánica e funcional da Área de Innovación Forestal, e con nivel de servizo, os seguintes centros:

a) O Centro de Innovación e Servizo Tecnolóxico da Madeira, CIS-Madeira.

b) O Centro de Investigación Forestal de Lourizán.

3. O Centro de Innovación e Servizo Tecnolóxico da Madeira, CIS-Madeira, exerce todas as funcións que lle sexan encomendadas en materia de especialización tecnolóxica, con especial foco nas pequenas e medianas empresas (pemes). Entre outros, ofrece os seguintes servizos:

a) Servizos especializados a empresas da industria forestal-madeira: a asistencia técnica, a mellora de procesos, o desenvolvemento de software tecnolóxico e industrial, o control de calidade e ensaios de materiais e produtos, entre outros, e a participación en proxectos en colaboración con empresas e outras entidades vinculadas á cadea monte-industria, como partners tecnolóxicos.

b) Transferencia de tecnoloxía e coñecemento nos seus ámbitos de especialización.

c) Asistencia e formación tecnolóxica especializada en materia de produtos baseados na madeira.

CVE-DOG: 14iqi073-s9y4-p736-49s3-ea977bquoeg9



d) Difusión da cultura do coñecemento e tecnolóxica no ámbito das súas funcións».

Disposición derogatoria única. *Derogación normativa*

Quedan derogadas cantas disposicións de igual ou inferior rango se opoñan ao establecido neste decreto.

Disposición derradeira única. *Entrada en vigor*

Este decreto entrará en vigor o día seguinte ao da súa publicación no *Diario Oficial de Galicia*.

Santiago de Compostela, vinte e nove de xullo de dous mil vinte e catro.

Alfonso Rueda Valenzuela
Presidente

María Jesús Lorenzana Somoza
Conselleira de Economía e Industria

CVE-DOG: 14iqj073-s9y4-p736-49s3-ea977bquoeg9

